

開放文學 – 科幻寓言 – 蝸觸蠻三國爭地記 跋

粵自苞符秘剖，渾沌竅開，外骨內骨之倫，股鳴脰鳴之族，涵淵卵育，種類蕃滋。爰有蝸觸蠻三國者，負殼而居，犄角相倚，安居則慶夫鹹苦，拗怒乃作其鱗。而蟻輪梅雨之牆，長城萬里；螻蟻槐安之國，拓地數圻。無何蠶叢界險，蟻鬥鬪開。螭螟以蚊睫為巢，螳螂為黃雀所捕。蟲沙疆域，幾成大一統之河山；蝸篆墳典，長埋億萬年之歷史。幸而蟲書莫考，雞碑獨存。有蟲天逸史氏者，功深螢案，業富蟬編，高才不數乎題糕，妙趣何殊於說餅。文通蝌蚪，屢翻盧佉之書；學飽蠹魚，三食神仙之字。極灰線草蛇之妙，發蛛絲馬跡之奇。化莖草為金身，納須彌於芥子。勾心鬥角，效康輿芥舟之小言；怒目低眉，作矛浙劍炊之危語。小說九百，本自虞初；寓言十九，何如漆史。蘇長公之嬉笑，盡是文章；淳於髡之滑稽，雜以隱語。雖雕蟲小技，或言壯夫不為；而班馬新裁，足為稗官生色矣。僕蟲長民跋